

Zainani Jusoh dilantik Akauntan Negara baharu

BERNAMA - September 3, 2025 @ 8:24am



Zainani Jusoh. - Foto Jabatan Akauntan Negara

KUALA LUMPUR: Timbalan Akauntan Negara (Korporat), Zainani Jusoh, dilantik sebagai Akauntan Negara yang baharu berkuat kuasa hari ini.

Pelantikan Zainani itu diumumkan Jabatan Akauntan Negara Malaysia (JANM) dalam kenyataan hari ini bagi menggantikan Datuk Nor Yati Ahmad yang bersara wajib hari ini.

"Surat pelantikan Zainani sebagai Akauntan Negara telah disampaikan oleh Ketua Setiausaha Negara, Tan Sri Shamsul Azri Abu Bakar di Putrajaya pada 27 Ogos lepas," menurut kenyataan itu.

Zainani yang berasal dari Tanah Merah, Kelantan berkelulusan Ijazah Sarjana Muda Perakaunan dari Universiti Putra Malaysia (UPM) dan adalah akauntan bertauliah serta ahli Institut Akauntan Malaysia (MIA) dan Institut Akauntan Awam Bertauliah Malaysia (MICPA).

- Peningkatan saliniti mendadak punca ikan di tasik Taman Gelora mati
- PM kongsi detik bertegur sapa dengan ketua pemerintah Korea Utara di China
- Lebih 500 dron, peluru berpandu sasar Ukraine jejas bekalan elektrik
- Syafiq, Akhimullah bantu Malaysia jinakkan China

"Zainani berpengalaman sebagai penjawat awam lebih 30 tahun apabila mula menyertai sektor awam pada 1994 sebagai akauntan di Pasukan Petugas Sistem Perakaunan Mikro, JANM.



"Sepanjang perkhidmatannya, beliau telah berkhidmat di pelbagai jabatan dan kementerian antaranya Lembaga Peperiksaan Malaysia, Kementerian Kerja Raya (KKR), Kementerian Dalam Negeri (KDN), Kementerian Luar serta Kementerian Perumahan dan Kerajaan Tempatan (KPKT)," menurut kenyataan itu.

RINGKASAN
BERITA



Zainani turut memainkan peranan penting dalam menukar landskap pengurusan perakaunan di kedutaan Malaysia luar negara dari manual kepada pendigitalan.

JANM memaklumkan perubahan besar itu membolehkan pengurusan kewangan di semua kedutaan Malaysia diurus dengan lebih cekap, tepat dan cepat.

Sebelum menjawat jawatan Timbalan Akauntan Negara (Korporat) pada September 2023, beliau pernah mengetuai Bahagian Khidmat Perunding JANM serta Bahagian Akaun Kementerian Kewangan dari 2019 hingga 2023.

Atas sumbangan dan kecemerlangan perkhidmatan, Zainani telah dianugerahkan darjah kebesaran Bentara Setia Mahkota sempena Hari Keputeraan Sultan Kelantan Sultan Muhammad V pada 2015.

"JANM ingin merakamkan penghargaan dan terima kasih tidak terhingga kepada pihak kerajaan atas kepercayaan yang diberikan kepada Zainani bagi menggalas tugas dan amanah sebagai Akauntan Negara bermula dari 3 Sept 2025," menurut kenyataan itu. – BERNAMA